
Cod Ymddygiad Bwrdd Ofcom

Atodiad 10 i God Llywodraethu Corfforaethol Ofcom

Llywodraethu ac Atebolrwydd Ofcom 15 Mawrth 2023 (a ddaeth i rym ar 1 Ebrill 2023)

Cynnwys

Adran

1. Cod Ymddygiad ar gyfer Bwrdd	1
2. Gwrthdaro rhwng buddiannau	3
3. Cyfathrebu allanol	7

1. Cod Ymddygiad ar gyfer Bwrdd

Pwrpas y Cod Ymddygiad a Chynnwys

- 1.1 Mae'r Cod Ymddygiad yn nodi'r saith egwyddor ymddygiad mewn bywyd cyhoeddus (yr "egwyddorion Nolan") y mae'n rhaid i Aelodau'r Bwrdd lynu wrthynt a'r gofynion o ran cyfrinachedd, gwrthdaro rhwng buddiannau (sy'n ymwneud â'r gofrestr buddiannau, datganiadau a rheoli gwrthdaro, buddiannau gwleidyddol, buddiannau ariannol a rolau newydd) rhoddion a lletygarwch, treuliau, siarad yn allanol, codi pryderon am gamymarfer a diogelwch.

Saith egwyddor bywyd cyhoeddus

- 1.2 Mae 7 egwyddor bywyd cyhoeddus yn berthnasol i unrhyw un sydd â swydd gyhoeddus. Y rhain yw:
- a) **Anhunanoldeb:** Ni ddylai deiliaid swyddi cyhoeddus ond gweithredu er budd y cyhoedd.
 - b) **Uniondeb:** Ni ddylai deiliaid swyddi cyhoeddus roi eu hunain o dan unrhyw rwymedigaeth i bobl neu sefydliadau a allai geisio dylanwadu'n amhriodol arnynt wrth iddynt wneud eu gwaith. Ni ddylent weithredu na gwneud penderfyniadau er mwyn cael manteision ariannol neu unrhyw fanteision perthnasol eraill iddynt eu hunain, eu teulu neu eu ffrindiau. Rhaid iddynt ddatgan a datrys unrhyw fuddiannau a pherthynas.
 - c) **Gwrthrychedd:** Rhaid i ddeiliaid swyddi cyhoeddus weithredu a gwneud penderfyniadau'n ddiuedd, yn deg ac ar sail teilyngdod, gan ddefnyddio'r dystiolaeth orau a heb wahaniaethu neu ragfarn.
 - d) **Atebolrwydd:** Mae deiliaid swyddi cyhoeddus yn atebol i'r cyhoedd am eu penderfyniadau ac am yr hyn y maent yn ei wneud a rhaid iddynt ganiatáu i eraill graffu arnynt yn y modd sydd yn angenrheidiol er mwyn sicrhau hynny.
 - e) **Bod yn agored:** Dylai deiliaid swyddi cyhoeddus weithredu a gwneud penderfyniadau mewn modd agored a thryloyw. Ni ddylai gwybodaeth gael ei chadw rhag y cyhoedd oni bai bod rhesymau clir a chyfreithlon dros wneud hynny.
 - f) **Gonestrwydd:** Dylai deiliaid swyddi cyhoeddus fod yn eirwir.
 - g) **Arweinyddiaeth:** Dylai deiliaid swyddi cyhoeddus ymddwyn yn unol â'r egwyddorion hyn. Dylent fynd ati i hyrwyddo a chefnogi'r egwyddorion hyn yn gadarnhaol a bod yn barod i herio ymddygiad gwael pryd bynnag y'i gwelir.

Gwrthdaro rhwng buddiannau

- 1.3 Rhaid i Ofcom gadw ei enw da o ran didueddrwydd, gonestrwydd a safonau proffesiynol uchel.

- 1.4 Ni ddylai fod unrhyw reswm dilys i unrhyw un allu awgrymu bod buddiannau neu safbwyntiau preifat wedi dylanwadu ar benderfyniadau Ofcom.
- 1.5 Ni ddylai Aelodau'r Bwrdd wneud elw drwy'r wybodaeth sydd ar gael iddynt fel Aelodau o'r Bwrdd.
- 1.6 Mae'n ofynnol i Aelodau'r Bwrdd lynu wrth God Ymddygiad Swyddfa'r Cabinet ar gyfer Aelodau Bwrdd Cyrff Cyhoeddus, sy'n cynnwys gofynion ar gyfer rheoli gwrthdaro rhwng buddiannau, yn ogystal â Chod Ymddygiad Ofcom ei hun ar gyfer Aelodau'r Bwrdd.

Cyfrinachedd

- 1.7 Bydd disgwyl i aelodau'r Bwrdd gadw'n gyfrinachol yr holl wybodaeth a deunyddiau a ddarperir iddynt yn Aelodau'r Bwrdd.
- 1.8 Mae Adran 393 o'r Ddeddf Cyfathrebiadau yn gosod cyfyngiadau ar unigolion o ran datgelu unrhyw wybodaeth heb gael caniatâd y sawl sydd wedi darparu'r wybodaeth.
- 1.9 Os bydd unrhyw wybodaeth yn cael ei datgelu yn groes i'r ddarpariaeth honno, mae hynny'n drosedd a allai arwain at hyd at ddwy flynedd o garchar a/neu ddirwy.
- 1.10 Bydd y cyfyngiadau hyn yn dal yn berthnasol ar ôl i Aelodau'r Bwrdd roi'r gorau i fod yn Aelodau o Fwrdd Ofcom, mewn perthynas â'r wybodaeth a gafodd yr Aelodau pan oeddent yn y swydd. Pwrpas hyn yw osgoi'r risg bod cwmni penodol yn cael mantais amhriodol dros ei gystadleuwyr drwy gyflogi rhywun a oedd – wrth gyflawni ei ddyletswyddau i Ofcom – wedi gallu cael gafael ar wybodaeth dechnegol neu wybodaeth arall y byddai'n deg i'r cystadleuwyr hynny ei hystyried yn gyfrinachau masnachu, neu wybodaeth ynghylch datblygiadau arfaethedig ym mholisi'r Llywodraeth a allai effeithio ar y cwmni hwnnw neu ei gystadleuwyr.

Pryderon am gamymarfer

- 1.11 Os yw aelod am godi pryder am gamymarfer, dylai godi ei bryderon â'r Cadeirydd neu'r Is-gadeirydd i ddechrau, fel sy'n briodol.

Polisi diogelwch

- 1.12 Gofynnir i Aelodau'r Bwrdd ddarllen a chydymffurfio â Pholisi Diogelwch Ofcom. Mae'r polisi hwn yn rhoi sylw i nifer o elfennau, gan gynnwys defnydd derbyniol o systemau gwybodaeth, diogelu gwybodaeth, dal gafael a chael gwared ar wybodaeth, delio â thrydydd partion a diogelwch eiddo.

2. Gwrthdaro rhwng buddiannau

Proses a gofynion

- 2.1 Mae Bwrdd Ofcom yn gallu awdurdodi gwrthdaro rhwng buddiannau. Mae Paragraff 17 o Atodlen 1 o Ddeddf Ofcom 2002 yn nodi bod yn rhaid i rywun sydd â buddiant beidio â chymryd rhan mewn unrhyw drafodaeth neu benderfyniad perthnasol oni bai fod Aelodau eraill y Bwrdd sy'n bresennol yn penderfynu y dylid diystyru'r buddiant.
- 2.2 Gall y Cadeirydd, Ysgrifennydd y Gorfforaeth a'r Cwnsler Cyffredinol ystyried a rhoi cyngor ar yr hyn sy'n cynrychioli gwrthdaro posibl neu wirioneddol rhwng buddiannau ac a oes modd rheoli hyn (er enghraifft, drwy gyfyngu ar fynediad at ddeunyddiau, neu esgusodi rhag trafodaeth a/neu benderfyniad).
- 2.3 Mae'r tîm Llywodraethu ac Atebolrwydd yn cadw cofrestr o fuddiannau. Rhaid i Aelodau'r Bwrdd ddarparu'r rhain cyn eu penodi ar eu cyfer eu hunain ac aelodau agos o'u teulu (h.y. partneriaid a phlant sy'n ddibynyddion) a gofynnir iddynt roi gwybod i Ysgrifennydd y Gorfforaeth am unrhyw newidiadau i'w cofrestr buddiannau. Wrth ymuno â Bwrdd Ofcom gofynnir hefyd i Aelodau ddatgan unrhyw fuddiannau gwleidyddol sydd ganddynt, neu fuddiannau sydd gan eu priod/partner neu blant sy'n ddibynyddion, mewn perthynas â'r canlynol:
- a) penodiadau i fwrdd neu swydd
 - b) cyflogaeth a/neu waith ymgynghori
 - c) ymddangosiadau rheolaidd ar y teledu a'r radio, neu ysgrifennu colofnau mewn papur newydd
 - d) buddiannau ariannol perthnasol
 - e) unrhyw benodiadau cyhoeddus a/neu elusenol
- 2.4 I gydymffurfio â statws Ofcom fel rheoleiddiwr annibynnol, mae'n amhriodol i unrhyw Aelod o'r Bwrdd gymryd rhan weledol mewn gwleidyddiaeth. Mae hyn yn cynnwys dal swydd wleidyddol ar lefel genedlaethol, ranbarthol neu leol neu ymgeisio am swydd o'r fath, cymryd rhan mewn ymgyrch wleidyddol i gefnogi plaid wleidyddol, a chyfrannu mwy na £7,500 i blaid wleidyddol mewn blwyddyn galendr. Mae gweithio'n llawn-amser i unrhyw adran o'r Llywodraeth Ganolog, neu fel swyddog yn y gwasanaeth sifil (gan gynnwys yn y gwleidydd datganoledig) neu i lywodraeth leol, yn annerbyniol hefyd.
- 2.5 Gofynnir i'r Pwyllgor Archwilio a Risg adolygu gwrthdaro rhwng buddiannau a'r gofrestr buddiannau bob blwyddyn. Gofynnir i Aelodau'r Bwrdd (ac aelodau o bwyllgorau cynghori Ofcom) lofnodi eu cofrestr buddiannau bob blwyddyn. Cyhoeddir y gofrestr buddiannau datgeladwy ar wefan Ofcom.
- 2.6 Datgan buddiannau yw'r eitem gyntaf ar agendâu'r bwrdd a phwyllgorau sy'n galluogi Aelodau'r Bwrdd i fynegi buddiannau newydd a/neu dynnu sylw at unrhyw wrthdaro posibl rhwng buddiannau sy'n gysylltiedig â thrafodaethau yn y cyfarfod. Yn ogystal â buddiannau

uniongyrchol, dylai Aelodau'r Bwrdd ddatgan lle mae gan gysylltiad agos fuddiant (e.e. aelod o'r teulu, partner neu ffrind agos).

2.7 Rhaid i Aelodau'r Bwrdd ddatgelu i Ysgrifennydd y Gorfforaeth fanylion unrhyw fuddiannau uniongyrchol sydd ganddyn nhw, eu partneriaid neu blant sy'n ddibynyddion mewn cwmni sy'n darparu gwasanaeth sy'n cael ei reoleiddio gan Ofcom (ac eithrio'r cwmnïau hynny sy'n mynnu bod Trwydded Telegraffiaeth Ddi-wifr yn unig i weithredu) pan fyddant yn ymuno â'r Bwrdd. At y dibenion hyn, mae buddiant ariannol uniongyrchol yn fater ariannol:

- uniongyrchol i Aelod, ei bartner neu blant sy'n ddibynyddion (e.e. cyfranddaliadau);
- sydd o dan reolaeth Aelod, ei bartner neu blant sy'n ddibynyddion (gan gynnwys, er enghraifft, buddiannau ariannol a reolir yn ôl disgrisiwn gan Aelod neu ei bartner ar gyfer pobl eraill); neu
- sy'n eiddo llesionol i Aelod, ei bartner neu blant sy'n ddibynyddion drwy gyfrwng buddsoddi, ymddiriedolaeth, neu gyfryngwr arall, pan fydd yr Aelod neu ei bartner naill ai'n rheoli'r cyfryngwr neu'n meddu ar yr awdurdod i oruchwylio neu gymryd rhan ym mhenderfyniadau

2.8 Ni chaniateir i Aelodau'r Bwrdd, eu partneriaid na phlant sy'n ddibynyddion ddal (neu reoli ar ran eraill) buddiant ariannol uniongyrchol (e.e. cyfranddaliadau) neu fuddiant ariannol anuniongyrchol (e.e. ymddiriedolwr ymddiriedolaeth ddall) mewn cwmnïau Categori A oni bai y rhoddir caniatâd gan y Cadeirydd (a fydd ond yn cael ei roi mewn amgylchiadau eithriadol ac â'r bwriad o drosglwyddo'r cyfranddaliadau). Bydd y Cadeirydd yn cael cyngor gan y Cwnsler Cyffredinol ac Ysgrifennydd y Gorfforaeth. Yn achos y Cadeirydd, y Cwnsler Cyffredinol a'r Cadeirydd fydd yn penderfynu a ddylid cadw'r cyfranddaliadau.

2.9 Gellir caniatáu i bob Aelod, eu partneriaid a phlant sy'n ddibynyddion ddal buddiannau ariannol uniongyrchol mewn cwmnïau Categori B, gyda chaniatâd Ofcom.

Categori	Disgrifiad
Categori A	<p>Cwmnïau sy'n darparu gwasanaeth sy'n cael ei reoleiddio gan Ofcom (ac eithrio'r cwmnïau hynny sydd angen Trwydded Telegraffiaeth Ddi-wifr yn unig i weithredu).</p> <p>Gall y rhain fod yn gwmnïau y mae eu busnes sy'n cael ei reoleiddio gan Ofcom wedi'i leoli yn y DU yn bennaf (fel ITV plc, STV Group plc, Royal Mail plc, BT plc, Tesco plc, Manchester United plc) neu gwmnïau sy'n rhan o grwpiau rhyngwladol ehangach sy'n weithredol ac yn cael eu rheoleiddio gan Ofcom yn y DU (fel Vodafone Group plc, Liberty Global Inc., Teleica S.A, Amazon.com Inc.).</p> <p>Bydd darparwyr eraill gwasanaethau ar-lein, gan gynnwys Alphabet Inc. (y mae ei is-gwmnïau'n cynnwys Google a YouTube), Meta Platforms Inc. (y mae ei is-gwmnïau'n cynnwys Facebook, Instagram a WhatsApp), Twitter Inc., yn perthyn i'r categori hwn maes o law wrth i broses reoleiddio Ofcom ehangu.</p>

Categori	Disgrifiad
Categori B	Cwmnïau eraill nad ydynt wedi'u cynnwys yng Nghategori A uchod, ond sy'n rhan o'r sector cyfathrebiadau, cyfryngau, ar-lein neu bost e.e. cynhyrchydd annibynnol a fasnachir yn gyhoeddus.

- 2.10 Os yw Aelod Anweithredol o'r Bwrdd yn ystyried ymgymryd â rôl ychwanegol, dylai yn y lle cyntaf gysylltu ag Ysgrifennydd y Gorfforaeth a fydd yn trafod hyn gyda nhw a'r Cadeirydd i ystyried a fyddai hyn yn cyd-fynd â bod yn Aelod o Fwrdd Ofcom. Yn gyffredinol, ni fydd cymryd rôl mewn cwmni sydd â rhan sylweddol o'i weithgarwch sy'n cael ei reoleiddio gan Ofcom yn cael ei ystyried yn un sy'n gydnaws â bod yn Aelod o Fwrdd Ofcom. Mae gwrthdaro'n debygol o godi pe bai Aelod o'r Bwrdd yn cymryd rhan yn y gweithgareddau canlynol yn y sectorau cyfathrebu neu bost neu ar lwyfan technoleg sy'n rheoli cynnwys y rhyngwrwyd:
- ymuno â'r Bwrdd
 - ymuno â chyfarfod cyngori
 - cael ei gyflogi
 - gwneud gwaith ymgynghorol
 - ymuno ag unrhyw gorff, sefydliad, elusen neu grŵp arall sydd â chysylltiad amlwg â'r sector cyfathrebu a'r sector post neu â llwyfan technoleg sy'n rheoli cynnwys y rhyngwrwyd.
 - a'r sectorau post neu gyda llwyfan technoleg.
- 2.11 Bydd ymgymryd â pholisïau mewn cwmnïau neu sefydliadau eraill yn y sectorau y mae Ofcom yn eu rheoleiddio, neu sy'n gysylltiedig â'r sectorau hyn, yn dibynnu ar ba raddau y mae'r cwmni neu'r sefydliad yn ymwneud â'r penderfyniadau y mae Ofcom yn eu gwneud, neu y mae penderfyniadau Ofcom yn effeithio arno, yn ogystal ag amlygrwydd y cwmni (e.e. os yw'n gyflenwr, a oes ganddo gysylltiad agos â chwmni a reoleiddir gan Ofcom).
- 2.12 Rhaid i Aelodau'r Bwrdd ddatgan a yw eu partner wedi'i gyflogi, neu'n cael ei gyflogi, gan gwmni sydd â rhan sylweddol o'u gweithgarwch yn cael ei reoleiddio gan Ofcom (ac eithrio'r cwmnïau hynny sydd angen trwydded Telegraffiaeth Ddi-wifr yn unig)
- 2.13 Rhaid i Aelodau'r Bwrdd Gweithredol hefyd gydymffurfio â'r polisi gwrthdaro rhwng buddiannau cydweithwyr sy'n nodi gofynion ar gyfer cydweithwyr mewn meysydd fel ymarferion caffael. Pan fydd Aelod Gweithredol o'r Bwrdd wedi gwneud cais neu wrthi'n trafod rôl benodol mewn cwmni sy'n cael ei reoleiddio gan Ofcom neu mewn sector y mae rheoleiddio Ofcom yn effeithio'n sylweddol arno, dylai roi gwybod i'r Prif Swyddog Gweithredol (a'r Prif Weithredwr, y Cadeirydd) a fydd yn trin y wybodaeth hon yn ddoeth ac yn penderfynu – fel sy'n berthnasol mewn trafodaeth â'r Cadeirydd – a oes angen cymryd unrhyw gamau i osgoi gwrthdaro gwirioneddol neu ymddangosiadol rhwng buddiannau. Os nad yw'r Aelod Gweithredol o'r Bwrdd yn siŵr a oes angen iddo wneud datgeliad, dylai geisio cyngor y Cwnsler Cyffredinol.

- 2.14 Ni ddylai Aelodau'r Bwrdd dderbyn unrhyw rodd na lletygarwch a fyddai'n creu rhwymedigaeth ar y rhoddwr nac yn amharu ar eu barn neu eu didueddrwydd personol neu broffesiynol (am ganllawiau manylach ar roddion a lletygarwch, gweler paragraffau A1.43 i A1.50).
- 2.15 Os bydd Aelod yn ansicr ynghylch sut mae dehongli'r canllawiau hyn (yn benodol, pa fuddsoddiadau sydd wedi'u cynnwys ym mha categorïau) neu os bydd angen iddo gael gwared ag unrhyw gyfranddaliadau sydd ganddo yn y sector cyfathrebiadau neu'r sector post neu mewn unrhyw gwmni y mae Ofcom yn ei reoleiddio er mwyn cydymffurfio â'r amodau hyn, dylai ofyn am arweiniad gan Ysgrifennydd y Gorfforaeth.

3. Cyfathrebu allanol

- 3.1 Bydd y cyfathrebiadau rhwng Ofcom a'r Ysgrifennydd Gwladol, neu swyddogion cyfatebol yn y gweinyddiaethau datganoledig, yn cael eu gwneud drwy'r Cadeirydd fel arfer, ac eithrio pan fydd Ofcom wedi cytuno y dylai Aelod o'r Bwrdd weithredu ar ei ran. Er hynny, mae gan Aelod unigol yr hawl i asesu'r Gweinidogion ar unrhyw fater y mae ef neu hi yn credu sy'n codi materion pwysig o ran ei ddyletswyddau ef neu hi fel Aelod o Ofcom. Mewn achosion o'r fath, byddai gofyn i weddill Aelodau'r Bwrdd gytuno fel arfer.
- 3.2 Y Prif Weithredwr, neu aelodau eraill o'r staff sydd wedi'u hawdurdodi i weithredu ar ran Ofcom, fydd y prif bwynt cyswllt fel arfer rhwng Ofcom a'r Adran dros Dechnoleg Ddigidol, Diwylliant, y Cyfryngau a Chwaraeon neu'r adrannau perthnasol mewn gweinyddiaethau datganoledig ar faterion o ddydd i ddydd.

Siarad yn gyhoeddus neu ymddangos ar y teledu, radio, ar-lein ac mewn print ar ran Ofcom

- 3.3 Fel egwyddor gyffredinol, y Cadeirydd neu'r Prif Weithredwr fydd yn siarad yn gyhoeddus ar ran Ofcom fel arfer.
- 3.4 O bryd i'w gilydd, bydd gofyn i Aelodau eraill siarad ar ran Ofcom mewn digwyddiadau i randdeiliaid neu ddigwyddiadau yn y diwydiant, a dylent fod yn ofalus iawn wrth dderbyn unrhyw wahoddiad i siarad yn gyhoeddus, gan gynnwys siarad â newyddiadurwyr, yn rhinwedd un o Aelodau Ofcom.
- 3.5 Mewn unrhyw sefyllfa o'r fath, dylai Aelodau, i ddechrau, ymgynghori ag ysgrifennydd y Gorfforaeth a'r Cyfarwyddwr Cyfathrebu, fel y bo'n briodol. Ym mhob achos, ni ddylai Aelodau ddatgan unrhyw safbwyntiau nad ydynt yn cyd-fynd â pholisïau Ofcom neu a allai roi argraff o benderfyniadau, pleidgarwch neu ogwydd gwleidyddol.
- 3.6 Dylai Aelodau hefyd osgoi datgan eu barn bersonol yn gyhoeddus ar faterion pan nad yw polisi Ofcom ar hynny wedi cael ei bennu (gan gofio ei bod yn bosib iawn bod Aelodau wedi bod yn cynnig cyngor – ac wedi cael gweld gwybodaeth – fel rhan o'r broses o ddatblygu'r polisi), a honno'n farn sy'n seiliedig ar rôl yr Aelod yn Ofcom. Ni ddylai Aelodau ddatgan barn bersonol pan allai hynny niweidio enw da Ofcom.

Mewn rhinwedd bersonol ar faterion heb fod yn gysylltiedig ag Ofcom

- 3.7 Nid yw Aelodau'n cael eu gwahardd yn llwyr rhag delio â'r cyfryngau mewn rhinwedd bersonol nad yw'n ymwneud ag Ofcom, nac wrth ddilyn diddordeb proffesiynol – er enghraifft, fel perfformwyr, arbenigwyr, beirniaid/adolygwyr neu sylwebwyr. Nid yw aelodau'n cael eu gwahardd yn llwyr rhag ymddangos ar y teledu na'r radio, cynhyrchu rhaglenni teledu neu radio, ac ysgrifennu blogiau/cyfrifon ar-lein neu mewn cylchgronau

neu bapurau newydd, na gwneud cyfraniadau ar gyfryngau cymdeithasol (e.e. Twitter, Facebook, LinkedIn a Google ac ati (gyda'i gilydd, 'y gweithgareddau a ganiateir').

- 3.8 Gall Aelodau fynegi safbwyntiau personol ar yr amod eu bod yn dweud yn glir eu bod yn siarad neu'n ysgrifennu mewn rhinwedd bersonol yn unig, a'u bod yn datgan eu barn breifat eu hunain ar faterion nad ydynt yn rhan o ystod o gyfrifoldebau Ofcom, neu ar faterion sy'n ddadleuol o safbwynt diwydiannol, gwleidyddol neu gyhoeddus sy'n berthnasol iddynt.
- 3.9 Pan fydd Aelodau'n dewis datgan barn bersonol, byddwn yn dibynnu ar eu synnwyr cyffredin; rydym yn disgwyl iddynt gymryd gofal wrth wneud hynny. Er enghraifft, dylid osgoi sylwadau a allai gael effaith negyddol ar enw da Ofcom (gan nodi y dylai'r holl sylwadau neu negeseuon ar gyfryngau cymdeithasol gael eu hystyried yn rhai cyhoeddus), a sylwadau ar bolisiau Ofcom. Dylid felly osgoi datganiadau o farn ar faterion sy'n ddadleuol o safbwynt gwleidyddol neu gyhoeddus y gellid ystyried eu bod yn peryglu enw da'r Bwrdd am ddiueddrwydd ar benderfyniadau golygyddol a phenderfyniadau eraill yn y byd darlledu, neu ei wrthrychedd wrth wneud penderfyniadau rheoleiddio economaidd.
- 3.10 I helpu gyda'r uchod, ac yn benodol mewn perthynas ag unrhyw erthygl arfaethedig ar-lein neu mewn papur newydd neu gylchgrawn, bydd Aelodau'n cael gwahoddiad i dynnu sylw Ysgrifennydd y Gorfforaeth a'r Cyfarwyddwr Cyfathrebu at erthyglau o'r fath, a dylent wneud yr un fath yng nghyswllt unrhyw gynnig i ymddangos ar raglenni teledu neu radio, neu i fod yn rhan o'r gwaith o'u cynhyrchu. Bydd hyn yn rhoi cyfle iddynt drafod a yw ymgysylltiad o'r fath yn dderbyniol.

Mynd i gynadleddau

- 3.11 Dylai pob gwahoddiad i fynd i ddigwyddiadau i randdeiliaid neu ddigwyddiadau'r diwydiant neu i siarad ynddynt gael ei ddangos i'r Prif Weithredwr i ddechrau neu, yn ei absenoldeb, i'r Cyfarwyddwr Cyfathrebu, i gael cyngor. Rhaid cymryd gofal i sicrhau bod gan Ofcom gynrychiolaeth briodol mewn digwyddiadau, a bod Aelodau'n cael eu briffio'n briodol cyn mynd iddynt.

Rheolau purdah

- 3.12 Dylai Aelodau'r Bwrdd osgoi ymweld a/neu gymdeithasu â rhanddeiliaid yn ystod cyfnodau 'purdah' a defnyddio'u disgresiwn wrth dderbyn gwahoddiadau i ymweld a/neu gymdeithasu â rhai rhanddeiliaid yn ystod cyfnodau purdah. Mae cyfnodau purdah fel a ganlyn:
- Cyfnodau cau ceisiadau a dyfarnu trwyddedau ar gyfer trwyddedau teledu, radio a thelegyfathrebu lle mae'r rhanddeiliaid sy'n gwahodd yn cymryd rhan fel ymgeisydd; a
 - Cyfnodau penodol pan fydd Ofcom yn gwneud penderfyniad arwyddocaol sy'n ymwneud â'r rhanddeiliad hwnnw neu a fydd yn effeithio arno.
- 3.13 Os oes gan Aelod o'r Bwrdd unrhyw amheuaeth ynghylch priodoldeb gwahoddiad/digwyddiad, dylai ofyn am arweiniad gan Ysgrifennydd y Gorfforaeth. Fodd

bynag, pan fydd Aelod o'r Bwrdd yn ymwneud yn uniongyrchol â'r broses benderfynu ar gyfer unrhyw fater penodol, ni ddylai dderbyn na chynnig lletygarwch i'r rhanddeiliad/rhanddeiliaid dan sylw o dan unrhyw amgylchiadau, ond nid yw hyn yn atal cyfarfodydd busnes arferol.

Atebolrwydd troseddol a sifil

- 3.14 Er bod unrhyw achos cyfreithiol a gychwynnir gan drydydd parti yn debygol o gael ei ddwyn yn erbyn Ofcom fel endid corfforaethol, mewn achosion eithriadol gellir dwyn achos (sifil neu, mewn rhai amgylchiadau, achos troseddol) yn erbyn y Cadeirydd neu Aelodau unigol eraill. Er enghraifft, mae'n bosib y bydd Aelodau'n atebol yn bersonol os byddant yn gwneud datganiad twyllodrus neu esgeulus sy'n arwain at golled i drydydd parti. Mae'n bosib y bydd Aelodau hefyd yn atebol am dorri cyfrinachedd o dan gyfraith gwlad, neu o dan ddeddfwriaeth masnachu mewnol, os byddant yn camddefnyddio gwybodaeth a gawsant yn rhinwedd eu rôl.
- 3.15 Fodd bynnag, ni fydd Aelodau sy'n gweithredu'n onest, yn rhesymol ac yn ddidwyll a heb esgeulustod yn gorfod bodloni unrhyw atebolrwydd sifil personol a fydd yn codi wrth iddynt gyflawni eu dyletswyddau i Ofcom, neu wrth eu cyflawni'n honedig. Bydd Ofcom yn indemnio'r Aelodau rhag hawliadau yn yr amgylchiadau hyn.

Treuliau

- 3.16 I hawlio treuliau teithio a threuliau eraill, mae'n rhaid i'r gwariant fod yn rhesymol ac yn angenrheidiol ar ran Ofcom yn unol â Pholisi Treuliau Ofcom. Ni ellir teithio gyda thocynnau dosbarth cyntaf yn gyffredinol, a dim ond mewn amgylchiadau eithriadol y bydd hynny'n cael ei dderbyn. Mae'n rhaid gwneud pob hawliad treuliau ar ffurflen hawlio briodol Ofcom, a rhaid eu cyflwyno o fewn 45 diwrnod i ddyddiad y gwariant. Mae'n annhebygol y bydd treuliau a gyflwynir yn hwyrach na hynny'n cael eu talu.

Rhoddion a lletygarwch

Rhoddion

- 3.17 Mae'n bolisi gan Ofcom i beidio â derbyn rhoddion gan unigolyn na sefydliad, ac i beidio â darparu rhoddion o'r fath oni bai bod gwerth de minimis. Os bydd unigolyn neu sefydliad yn mynnu rhoi rhodd i Aelod yn rhinwedd ei rôl fel Aelod, a bod y rhodd yn werth mwy na £10, dylid ei rhoi i elusen a ddewisir gan Ofcom. Gellir derbyn rhoddion sy'n werth llai na £10.
- 3.18 Rhaid i'r holl roddion sy'n werth mwy na £10 gael eu datgan a'u cofnodi ar y Gofrestr Rhoddion a Lletygarwch.

Lletygarwch

- 3.19 Mae'r problemau a'r manteision sy'n gysylltiedig â derbyn lletygarwch yn amrywio'n fawr ar draws y diwydiannau sy'n cael eu rheoleiddio gan Ofcom.
- 3.20 Dylai Aelodau roi sylw gofalus i'r cyngor yn y paragraff canlynol wrth benderfynu a ydynt am dderbyn cynigion lletygarwch ai peidio. Dylid tybio na ellir derbyn cynigion lletygarwch gan y sefydliadau hynny y mae Ofcom yn eu rheoleiddio. Rhaid i'r Aelod ysgwyddo'r baich o egluro pam y dylid derbyn cynnig o letygarwch.
- 3.21 Dylai Aelodau ystyried y canllawiau cyffredinol a ganlyn, a all helpu i asesu rhinweddau cymharol derbyn gwahoddiad:
- a) **Categori 1:** Mae'n bosib y gellir derbyn lletygarwch mewn digwyddiadau sy'n cynnig cyfleoedd i rwydweithio â rhanddeiliaid Ofcom, ac felly a allai hyrwyddo neu gyfrannu at waith Ofcom. Er enghraifft, mynd i ginio gwobrau diwydiant.
 - b) **Categori 2:** Mae lletygarwch sy'n gysylltiedig â gwaith a gynigir gan un rhanddeiliad neu drwyddedai yn dderbyniol, pan fydd yn amlwg bod hynny o werth i waith Ofcom ac i'r diwydiant dan sylw yn ehangach. Er enghraifft, cinio gwaith.
 - c) **Categori 3:** Dylid gwrthod yn gwrtais unrhyw gynnig lletygarwch sydd o fudd personol i'r sawl a fydd yn derbyn y cynnig os bydd yn anodd cyfiawnhau'r budd i Ofcom, neu os oes risg o duedd ymddangosiadol neu sylw niweidiol. Er enghraifft, gwahoddiadau gan rhanddeiliaid Ofcom i ddigwyddiadau diwylliannol neu chwaraeon, fel cael cynnig tocynnau i ddigwyddiad Proms y BBC, i rownd derfynol Cwpan yr FA, neu i gyngerdd yn yr O2 Arena.

Cofrestr rhoddion a lletygarwch

- 3.22 Bydd Ofcom yn cadw cofrestr o roddion a lletygarwch, lle dylai pob cynnig o letygarwch perthnasol y mae Aelodau Bwrdd wedi'u derbyn, neu wedi'u darparu, gael eu cofnodi at ddibenion atebolrwydd a chysondeb. Bydd y gofrestr hon ar gael i'r cyhoedd.
- 3.23 Mae'r gofrestr hon yn cael ei chyhoeddi ar wefan Ofcom. Mae'n rhaid i Aelodau roi gwybod i Ysgrifennydd y Gorfforaeth am yr holl roddion a lletygarwch y maent yn eu derbyn neu'n eu darparu.
- 3.24 Gall Ysgrifennydd y Gorfforaeth roi cyngor i Aelodau ynghylch rhoddion a lletygarwch perthnasol. Dylid tynnu sylw Ysgrifennydd y Gorfforaeth at unrhyw rai y bydd Aelodau yn eu derbyn.

Diogelu data

- 3.25 At ddibenion cydymffurfio â'r ddeddfwriaeth Diogelu Data, mae Aelodau'n rhoi caniatâd i Ofcom gadw, prosesu a chael mynediad at eu data personol at unrhyw ddibenion.

Cyfyngiadau gadael

- 3.26 Ar ôl i'w swydd ddod i ben, rhaid i Aelodau ddychwelyd yr holl eiddo (gan gynnwys y canlynol, ond heb eu cyfyngu i hynny: dogfennau a meddalwedd, cardiau credyd, offer cyfrifiadurol, allwedd i chardiau diogelwch) sy'n eiddo i Ofcom.